

LA QUOTIDIANA

FMR Fundaziun Medias Rumantschas, Via da Masans 2, 7000 Cuira, 081 544 89 11, redacziun@fmr.ch



Trun sa regorda da l'onn nunemblidaivel
In film ed in cudesch han ils da Trun inaugurà sonda passada. Quels regordan a l'onn giubilar 2024. **Pagina 5**



In crimi ch'è propi stà in «affer da famiglia»
L'autura putera Gianna Duschletta ha scrit in crimi. Il plot ha ella sviluppà ensemen cun sia famiglia. **Pagina 7**

FMR FUNDAZIUN MEDIAS RUMANTSCHAS
südostschweiz

LECTURA RUMANTSCHA



DAVID TRUTTMANN/FMR

Ils ultims plets rumantschs?

Sche ti vas en libreria, lura datti curunas plain crimis: Henning Mankell, Donna Leon, Agatha Christie, Andrea Camilleri ed anc blers auters. E crimis rumantschs? – I na dat betg uschè blers. Però i dat era victimas ch'han ditg lur davos plets en net e stget rumantsch! L'autura putera Gianna Duschletta ha ussa scrit in crimi che porta il titel «Affers da famiglia». Sco ch'ella tradescha en l'intervista, ha ella propi sviluppà il plot «en famille», vul dir vi da la maisa cun l'atgna famiglia. Lain sperar che quellas discussiuns na sajan betg idas a finir mal ... **Pagina 7**

Breil è en la sumbriva

«Segir betg!» – pensas ti ussa. Il vitg da Breil n'è segir betg en la sumbriva, mabain sin spunda sulegliva! Ma exact quai è forsa era in problem dal territori da skis da Breil. Quel ha



Ina da bleras pistas dal territori da skis Breil-Vuorz-Andiast, preparada la fin da december 2022. FOTO ANDREAS CADONAU

mintgatant, pervi da si'exposiziun sulegliva, in pau difficultads cun la naiv. I duvrass investiziuns per exempel en in nov access si da la val. Ma danunder prender ils daners? Las pendicularas èn plitost en la «sumbriva finanziaria». Venderdi èn vegnidas discutadas schliaziuns. **Pagina 3**



La chogna da scola Gia sustegna ed accompagna ils scolars e las scolaras da la secundara da Vaz. FOTO TONI VINZENS

Il chaun procura per ruaus!

Sche ti legias questa frasa, lura has ti probabel in cler maletg en testa: «Il chaun procura per ruaus!» – Probabel vesas ti in chaun da polizia che fa urden cun ils laders. U che ti vesas in chaun pastur che fa urden cun nursas e lufs. Però adarg, tes maletgs t'engianan. I va numnadamain per Gia, il nov «chaun da scola» en la secundara a Vaz. Gia procura apunta per calma e ruaus en stanza da scola. **Pagina 8**

Dal rest, in pitschen mument da ruaus e da pasch ha era chattà il columnist Rafael Müller, dentant betg en scola, mabain tar il sontg Antoni da Padua. Buna lectura!

Grazia ad «Anavon» va ei vinavon

Venderdis sera ha il cussegl d'administraziun dallas pendicularas da Breil presentau alla radunonza d'acziunaris la situaziun finanziaria. El ha dau enconuscent che la proxima stagiun d'unviern seigi garantida, denton mo grazia ad ina grupp d'investurs privata.

MARTIN GABRIEL/FMR

A caschun dalla radunonza generala dallas pendicularas da Breil da venderdis sera ha il cussegl d'administraziun svidau il puppen pertuccont la situaziun finanziaria dall'interpresa. «Las finanzas fan gronds quitaus a nus», ha Hansueli Baier, il president dil cussegl d'administraziun dallas pendicularas da Breil detg en connex culla situaziun ch'el ha presentau agl acziunariat. «Nossas finanzas han piars gl'equiliber», aschia il president. La grupp d'acziunaris privats cul num «Anavon», che ha gia investiu ils davos diesch onns siat milliuns francs

«Nossas finanzas han piars gl'equiliber.»

Hansueli Baier, president dil cussegl d'administraziun dallas pendicularas da Breil

ellas pendicularas e che ha era iniziàu il Pradas Ressor, ei fetg interessada ch'il menaschi funcziuna bein. Ella metta ussa aunc ina gada a disposiziun denter in e dus milliuns francs. Cunquei ei il menaschi garantius la proxima stagiun d'unviern. Cun Roman Flepp ed Adrian Bergamin, il president communal niev ed il gerau niev dalla vischnaunca da Breil, han las acziunarias ed ils acziunaris elegiu dus novs commembers dil cussegl d'administraziun. Sper els ha la radunonza elegiu era Otmar Seiler da Breil ed il secundindigen Adrian Oehler sco novs commembers dil cussegl d'administraziun. **Pagina 3**

«Pil giubileum da 500 onns haveva la vischnaunca engaschau treis fotografats. Quella gada ha ins confidau quella lavur mo al pedel.»

Lotar Tomaschett da Trun ha accompagnà las festivitads da 600 onns Ligia Grischa – sco fotograf e pedel. – Pagina 5



La Gia che gida

La scola secundara da Vaz ha dapi in mez onn ina nova scolara. U èsi forsa perfin ina nova scolasta? – La chogna Gia è mintgamai durant in avantmezdi l'emna en stanza da scola. Las «incumbensas» dal chaun da scola da Vaz: promover las cumpetenzas socialas dals giuvenils, procurar per ina bun'atmosfera en classa e gidar singuls uffants cun sia moda calma. Tenor ils resuns da scolaras e scolars para la preschientscha da la chogna dal raz labradoodle dad avoir effect, sco ch'il solar Elia ha confermà: «Cun Gia èsi pli ruassaiel ch'uschiglio.» (fmr/dat) **Pagina 8**



Servetsch d'abunents e da distribuziun: tel. 0844 226 226 mail: abo@somedia.ch